

Lansamentu ba Programa Prémio Nasionál Nutrisaun nian

City 8, Haslaran

Segunda-feira, loron 9 fulan-agostu tinan 2021, tuku 11:00 dadeer

Exmu. Sr. Ministru Agrikultura no Peskas

Exmu. Sr. Vise-Ministru no Ministru Interinu Negósius Estranjeirus no Kooperasaun

Distintu Membro Governu sira

Exmu. Sr. Koordinadór Rezidente Nasoins Unidas nian iha Timor-Leste

Distintu Membro no Representante sira husi Ajénsia Espesializada Nasoins Unidas nian (UNICEF, WHO, WFP, FAO no sira seluk tan)

Distintu Membro no Resprezentante sira Korpu Diplomátiku nian

Distintu Membro no Representante sira husi Ajénsia Kooperasaun Bilateral no Multilateral nian

Senhora no no Senhor sira

Distintu Konvidadu sira

Benvindu mai serimónia **Lansamentu Programa Nasionál Nutrisaun nian** ne'ebé implementa ona husi Sekretariadu Nasionál SUN Movement Nasoins Unidas nian ne'ebé iha kolaborasaun ho Membro sira Komisaun Interministeriál Seguransa Alimentár nian (KONSSANTIL), ne'ebé tutela iha lideransa husi S. Exa. Ministru Agrikultura no Peskas.

Prémio Nasionál ida ne'ebé konta ho apoiu Finanseiru jenerozu ho U\$S 100.000 (dolar amerikanu rihun atus-ida) husi **Programa Alimentasaun Mundiál (WFP)** no ho apoiu tékniku husi Parseiru sira Dezenvolvimentu nian, nasionál, internasionál sira, liuliu husi Fundu Nasoins Unidas nian ba Infánsia (UNICEF) no husi Departamentu Asuntus Externus Austrália nian (DFAT).

Prémio Nasionál ida ne'ebé fó ezemplu sira ne'ebé dí'ak ba Prémio Prezidensiál Nutrisaun nian, ne'ebé implementa ona durante ha'u-nia mandatu entre tinan 2014 no tinan 2017, ne'ebé rezultadu no rekomendasaun dí'ak sira mak nafatin orienta ninia continuidade no alargamentu.

Kontinuidade ida ne'ebé interrompe tiha iha tinan 2017, maibé ninia determinasaun no empenhu ne'ebé kontinua husi Governu ida ne'e iha imperativu kumprimentu ba ninia Programa, hodi alkansa objetivu nasionál boot nian atu **Halakon Hamlaha no Sub-nutrisaun** ne'ebé prevee ona iha Planu Estratéjiku Dezenvolvimentu Nasionál (PEDN) no iha kompromisu sira ne'ebé asume husi País ba Objetivu sira Dezenvolvimentu Sustentavel nian (ODS).

Ho ksolok boot ne'ebé ita lansa fila-fali Programa ne'ebé ho intensaun atu sai fonte inspirasaun nian, enkorajamentu no estímula tebes **Sidadaun no Komuidade Alimentár sira** ne'ebé informada, ativa, partisipativa no organizada liu, ho destake ba papél autoridade lokál sira, nune'e mós ba nesesidade atu envolve Juventude no devér Inkluzau nian husi grupu Femininu sira no husi grupu Portadór Inkapasidade sira.

Ita hakarak ita-nia sidadaun no komuidade sira konxiente liu ba sira-nia devér no responsabilidade, atu apoia esforsu nasionál sira hodi halakon Hamlaha no lisan ladí'ak sira

kona-ba nutrisaun nian, hodi promove sira-nia partisipasaun efetiva iha **Planu Nasionál Seguransa Alimentár nian**, ne'ebé foin lala'is ne'e aprova ona husi Governu no akompanha inisiativa husi S. Exa. Sekretáriu-Jerál Nasoins Unidas nian, iha esforsu globál boot hodi hadi'a Sistema Ai-han Mundiál nian.

Ita hakarak promove inovasaun, kreatividade no empreendedorizmu, ne'ebé envolve parseiru sira dezenvolvimentu nian iha implementasaun planu no medida oioin hodi kombate hamlaha no Sub-nutrisaun, inklui tékniku, peritu, espesialista ka estudiozu sira ba nesesidade atu debate iha **Diálogo Nasionál** ho tema sira "*hahán saudavel no belun ambiente nian*", iha espíritu Komuidade Alimentár ida ne'ebé loos.

Debate ne'ebé sei kontribui ho loloos hodi hadi'a ita-nia prosesu sira produsaun, distribuisaun no armazenamentu ai-han nian, hodi insentiva kurva dekrexente husi taxa subnutrisaun nasionál sira, ne'ebé iha tinan 2010 afeta ba populasau 58% no iha tinan 2020 kontinua afeta ita-nia sidadaun sira hamutuk 48%, liuliu ba sira ne'ebé maka presiza liu [karensiadu], vulneravel no desfavoresidu liu.

Senhora no Senhor sira

Distintu konvidadu sira

Prémio Nasionál Nutrisaun nian ne'ebé ohin ita lansa ne'e ho objetivu atu promove ezemplu no prátika di'ak internasionál sira, ne'ebé hatudu katak métodu sira ne'ebé avansadu liu, bele no tenke adapta ba realidade Timoroan nian.

Ita konsege hatudu ona propóztu ida-ne'e husi tinan 2014 to'o 2017, no ita bele halo fali propóztu ne'e no divulga fila-fali iha nivel nasionál, ezemplu husi Grupu, Aldeia ka Suku sira ne'ebé maka di'ak liu, ne'ebé kontribui iha prátika ba Seguransa Alimentár Nasionál nian.

Ha'u aproveita lansamentu ida-ne'e hodi kongratula Parseiru Sosiedade Sivil sira hotu, liuliu ba empreza ki'ik ka mikro empreza sira ne'ebé participa ona iha Programa Sesta Bázika no **grupu juventude, feto, no lokál sira**, ne'ebé maka manán ona iha edisaun anteriór Prémio Nasionál Nutrisaun nian, no ne'ebé husi sira-nia ezemplu no prezensa hanesan onra tebes mai ita.

Ho ita boot sira-nia ezemplu no rezultadu di'ak sira ne'ebé alkansa ona, bele haree katak ne'e posivel atu Halakon Hamlaha no Kombate Subnutrisaun iha ami-nia País.

Importante maka sidadaun ida-idak entrega isin no klamar ba ida ne'ebé maka sira halo ho dedikasaun, empenhu, esforsu, serbisu ekipa no espíritu pertensa nian.

Ida-ne'e la'ós de'it dezeju, mehi ka esperansa, maibé, buat ne'ebé bele atinje iha prazu badak ho mobilizasaun husi komuidade no sidadaun sira.

Mobilizasaun ida ne'ebé sei benefisia ho seguru husi destake ne'ebé prémio ida-ne'e fasilita iha **órgaun sira komunikasaun** sosiál nian (imprensa eskrita, rádiu, televizaun no rede sosiál sira), ne'ebé ami agradese ba prezensa no ami konvida hodi divulga regulamentu, kondisaun sira no prosesu kandidatura nian atubele alkansa públiku hotu-hotu, sein exesaun, liuliu iha área remota sira no izolamentu ne'ebé estremu liu.

Ha'u hakotu ho liafuan apresu no agradesimentu nian ida ba Doadór no Parseiru Internasionál sira hotu, ne'ebé apoiu hodi enkoraja ami hasoru futuro ho esperansa renovada iha Dezenvolvimentu Sistema Nasionál Alimentasaun nian, ne'ebé sustentavel,

justu no ekuitativu liu, iha kapasidade hodi redús desperdísiu ai-han no konkretiza ita-nia objetivu sira hotu.

Ba Timor-Leste ida ho Hamlaha Zero!

Ba País ida ne'ebé saudavel liu, ho ema sira ne'ebé iha nutrisaun di'ak!

Ba Mundu ida ne'ebé justu, ekuitativu no ho Sistema Alimentasaun ida ne'ebé di'ak!

Obrigadu barak!

Na'i Maromak haraik bensaun mai ita hotu!